

ҲАМИДХОН ИСЛОМИЙ

**СУЛТОН УЛ-
МУЪИЗЗУДДИН АБУ
МАНСУР МОТУРИДИЙ
АС-САМАРҚАНДИЙ**

Фафур Фулом номидаги Адабиёт ва санъат нашриёти
Тошкент – 2000

86.38
И80

Тақризчи: филология фанлари доктори,
профессор Сайдбек ҲАСАНОВ

И 0403000000-86 режага кўшимча, 2000 © Ҳамилхон Исломий,
М352 (04) — 2000 Гафур Ғулом номидаги
ISBN № 5-035-01935-8 Адабиёт ва санъат нашриёти,
2000 и.

СҮЗ БОШИ

Инсоният ўз ибтидосидан бошлаб моддий ва маънавий дунёни идрок этиш, Яратувчи билан яралмишнинг узвий боғлиқлик сиррини билиш, Оллоҳга сифиниш, унга интилиш масаласига қизиқиб келган эди. Ранг-баранг мавжудотларга кўра бу оламдаги пайдо бўлиш, ўзгариш ва йўқолиш ҳодисалари замираидаги улуф бир қудрат мавжудлигини сезган. Аммо бу улуф қудратни Яратувчи сифатида тасаввур қилса ҳам, уни идрок этиш муаммолигича қолаверди. Минглаб йиллар ўтди, ҳар хил динлар пайдо бўлди, лекин Оллоҳнинг Сиррул-асори сирлигича қолди. Узоқ йиллик бой тарихимизда аждодларимиз ҳам Зардушт, Буддо ва бошқа дин-эътиқодларга учраб, кўп жафо ва мashaққатли жараёнларни бошидан ўтказди. Кўп пайғамбарлар дунёга келди, ҳар хил динлар таъсирига учрадик, барча динлар ўз иши, вазифасини бажарди ва кетди...

Ислом дини майдонга келиб, минтақамиизда илгаридан мавжуд бўлиб келган динларга нисбатан мукаммал таълимоти, қонун-қоидалари билан улуф бир эътиқод сифатида қарор топди. Оллоҳ бир деб тасаввур қилса ҳам, табиийки, бу тасаввур қандай қобиқдаги русум, тушунчаларга эга бўлмасин, шундайлигича қолиб, асрлар давомида тафаккур эгалари идрокини банд этган энг муҳим муаммога айланди. Ушбу сирлар оламини билишга интилиш ҳам узлуксиз давом этаверди.

Ислом ўз мавқеига эга бўлгандан сўнгра Қуръони Каримни кенг тушуниш учун шарҳлар, тафсирлар ёзила бошлади. Шариат илми ва Ҳақиқат илми расмийлашди. Яқин Шарқ, Марказий Осиё ва туркестонлик мусулмон олиму фузалолар Ислом илми таъвожига буюк ҳиссалар кўшдилар. Оллоҳнинг яккаю ягоналиги, Оннинг бир эканлиги тўғрисидан тавъид сиртбозланашгул бўлишиди.

Бироқ тавҳид ҳаддан ташқари нозик илм бўлгани сабабли, яширин илм сифатида қарор топди, уни ошкор қилиш тақиқланган эди. Чунки тавҳид илмининг мураккаблиги сабабли Сиррул-асрорнинг ошкора қилиниши у олиб келиши мумкин бўлган ихтилофлар, инкорий қарашлар олдини олиш чораси эди.

Ислом илмининг тараққий этиши илм соҳаларининг тез юксалиши, олиму фузало ва даҳоларнинг кўпайишини, Оллоҳ сиррига бўлган интилишни янада кучайтирди. Натижа шу бўлдики, Қуръон асосида Калом илми (Илоҳий илм), Шариат асосида фикҳ илми (мусулмон ҳуқуқшунослиги) таркиб топди. Бу соҳада тасаввуф аҳли (ўз руҳини Оллоҳ билан узвий боғловчилар) ҳам майдонга, ошкораликка чиқди. Улар ўз таълимотлари билан бевосита Оллоҳ курдатининг сирри томон интилдилар.

Ислом уламолари ва тасаввуф аҳли ўз фаолиятларини ушбу Сиррул-асрор билан боғлиқ ўзига хос илмий таълимотда олиб борганлар. Фаннинг бу жабҳасида, Сирлар сиррида иш кўрган замон уламолари ва фузалолари орасида буюк қобилият эгаси Абу Мансур Мотуридий ҳам илмий фаолият олиб борар экан, мазкур ўта нозик ва улуғвор соҳада ул зоти муборак ёзган машҳур асарлар жумласида “Тавҳид” асари ҳам бор эди. Ушбу асар ўша замон ва давр эҳтиёжи сифатида дунёга келган бўлса ажаб эрмас. Сабаб улдурки, Мотуридий яшаган давр Ислом оламининг “Олтин даври” ҳисобланган. Ана шу даврда Ислом илмий маркази Бағдоддан Ўрта Осиёга кўчганда Самарқанд ўша “Олтин давр” марказига айланган эди. Мотуридий тақдир иродасига мувофиқ Ислом илмидаги буюк қашфиётлари ва бу илм соҳасидаги голибона илмий муваффақиятлари эвазига “Абу Мансур”, яъни “Голиб ота” мартабасига мушарраф бўлдилар. Ул зоти муборак “Абу Мансур” номи билан шуҳрати дунёга ёйилди, азалий илм макони бўлган она Ватанимиз шуҳратини ҳам оламга танитди.

Мамлакатимизда Истиқдолнинг ҳаётбахш нури-зиёси баракотидан, ижтимоий-сиёсий, иқтисодий-маданий, маърифат ва маънавият соҳаларида халқимиз янгича ўзгариш, янгиланиш, ривожланишга мушарраф бўлмоқда. Ватанимиз, халқимиз тарихига оид қадим ва кўхна меросимизга қайтадан қўл узатиб қалам

тебратмоқдамиз. Аждодларимиз тарихига адолат билан ёндошиб, улар қолдирган олтин мерослардан ибрат ва баҳра олмоқдамиз. Президентимиз И.А.Каримов Фармонига кўра буюк ватандошимиз Абу Мансур Мотуридий таваллудининг 1130 йиллигини нишонлаш арафасидамиз. Баҳоли қудрат буюк бобомиз Абу Мансур Мотуридий ҳазратлари тантанасига бағишлаб, манбаларга таянган ҳолда, Сиз китобхонларга бир рисола тақдим этилди.

Ушбу камтар ишимиздан оз бўлса ҳам тўғри тушунчага келсангиз, бу каминани ёд этишни унутмагайсиз.

АБУ МАНСУР МОТУРИДИЙ АС-САМАРҚАНДИЙ

Буюк даҳо, улуг мутафаккир Алишер Навоий “Султон ул-муъиззуддин”, яъни диннинг иззатли султони деб атаган ул зоти муборакнинг асли ўз исми ҳам, отасининг исми ҳам Муҳаммад бўлган. Бобосининг исми Маҳмуддир. “Ислом қомуси”да унинг 257 ҳижрий (мелодий 870) йили таваллуд топганилиги кўрсатилади. Бул зоти азиз Самарқанднинг Мотурид мавзеида туғилган. 333 ҳижрий (мелодий 944) йилда Самарқандда вафот этган. Аммо унинг туғилган ва вафот этган йиллари манбаларда турлича кўрсатилган. Ҳусусан, ҳазрат Алишер Навоий ул зотнинг вафоти йилини 335 ҳижрий деб кўрсатади. Қабри Самарқанднинг Чокардиза гўристонидадир. Қабр жойи зиёраттоҳга айланган.

Абу Мансур исм олдида қўлланадиган кунйадир. Кунья эса, буюк зотлар исмига қўшилиб айтиладиган мартабасига айланган. Абу – арабча ота, Мансур – ғолиб, демакдир. Бундан бошқа И мом ул-ҳидо (Ҳақ йўлига бошловчи), И мом ул-мутакаллимин (Калом олимларнинг бошловчиси) каби улуг сифатларга эга бўлганлар. Мотурид буюк уламонинг туғилган жойи бўлиб, ўша жойни ўзига нисба қилиб олган. Бу жой дунёга машҳур Самарқандда бўлганлиги учун ўз нисбасига ас-Самарқандий деб янада аниқлик берган. Накл қилишларича, Кутайба ибн Муслим Самарқандни фатҳ этач, Амири Муҳожирни Самарқандга ҳоким этиб тайинлайди. Ҳоким Кўҳак тоғининг жанубий этагидан Обираҳмат аригини қаздираётган чогида Хизр алайҳиссалом учрашиб: “Моътуриду?” (“Нима истайсиз?”) – деб сўраганда: “Моътуриду!” (“Сув истаймиз”), – деб жавоб берган экан. Ана шундан бери қазиб келтирилган Обираҳмат аригидан суғорилган ерлар “Мотурид” номи билан юритиларкан. Демак, ўша мавзә Абу Мансур ҳазратлари туғилишидан анча олдин Мотурид номини олган.

АБУ МАНСУР МОТУРИДИЙ НАВОИЙ ВАСФИДА

Алишер Навоий 901 (1495–96) йили ёзган “Насойим ул-муҳаббат мин шамойим ул-футувват” (Улуғлик хушбўйликларини таратувчи севги шаббодалари) номли тазкираси муқаддимасида қўйидагиларни ёзади: “Уламои умматий к-анбиёи бани Исроила Ва айзан Ал-уламоу варасат ул-анбиёи аҳодиси андин хабар берур”¹. (Умматим уламоси бани Исроил пайғамбарларидек ва яна уламолар пайғамбарлар ворисидир.) Буюк мутафаккир Алишер Навоий ўз даҳоси билан битган ана шу тазкирасида Турк машойихлари қисмининг 649 авлиё тартібида, Абу Мансур Мотуридий ҳақида қўйидагиларни ёзади: “Шайх Абу Мансур Мотуридий қуддиса сирруҳу. Ўз замонининг аълами уламоси эрмиш. Ул вақт уламоси аларни Султонул мӯъиззуддин дер эрмишлар. Зоҳир ва ботин улуми (илмлари) била ороста (безатилган) эрмишлар. Алардин гариф ҳолот манқулдур...”². А.Навоий Мотуридий тўғрисидаги васфни даҳо маҳоратда ёзган эдилар.

Табаррук илмий асар ҳисобланувчи “Насойим ул-муҳаббат” Ўрта Шарқ, Ҳиндистон ҳамда Марказий Осиё ҳудудида яшаб ижод этган ва фаолият кўрсатган 770 авлиёлар сирасининг тазкирасидир. Демакки, Абу Мансур Мотуридий авлиё мартабасига етган улуғ зотлардан бўлган. Алишер Навоий ул зотга нисбат берган “Шайх” калимаси ҳам Ислом илмida ва тасаввуф таълимотида етакчи, йўлбошчи маъносини билдиради.

“Ўз замонининг аълами уламоси” иборасига келсак, бу унинг ўша замон олимларининг пешқадами, энг

¹ Русия Фанлар Академияси Шарқшунослик институти. Санкт-Петербург бўлими қўлэзмалар хазинасида сақланаётган 97 Д рақамили қўлэзмадан фойдаландик. Матн давомида иқтибослар шу қўлэзма асосида қисқача “Насойим” номи билан кўрсатилади.

² “Насойим”. 98 ⁶ варақ.

билимдонларнинг билимдони эканлигини англатади. Хўш, бу қайси замон эди?

Бу замон Ислом оламининг “Олтин даври” замони эди. Илм-фан фоят юксалиб, тараққиётга йўл очган, дунёвий илмлар жаҳонни лол қолдирган замон эди. Осмон илми, юлдузлар илми, Куръон асосида Калом илми, Шариат асосида фикҳ илми фан даражасига кўтарилиган замон эди. Тасаввуф таълимоти ҳам ўз мақомлари билан шаклланиб мустақил илгарилаган, соғ муқаддас эътиқод бўлган Исломнинг фан даражасига кўтарилиган замони эди. Шу сабабли Ислом учун масжиди жамоа, тасаввуф учун хонақоҳ, илм-фан учун мадраса қурилган. Бу замоннинг буюк вакиллари Абу Бакр Термизий (IX аср), Зуннун Мисрий (вафоти 860 ҳ.), Боязид Бистомий (вафоти 874ҳ.)лар бўлса, Жунайд Бағдодий, Мансур Ҳаллож, Шайх Абу Бакр Шиблий, Шайх Абдуллоҳ Ҳафиф, Абул Ҳасан ал-Ашъарий, Шайх Абул Қосим ал-Ҳаким Самарқандий уларнинг замондошлари эдилар. Бу чоғда замонасининг буюк алломалари бир-бирларининг илмий, ижодий фаолиятларидан албатта боҳабар бўлиб турган замон эди. Демакки, Мотуридий буюк даҳолар замонаси билимдонларининг билимдони – “аълами уламоси” бўлган эканлар. Шу жиҳатдан ўша замон олимлари динда иззат қиласиган султони, яъни “Султонул муъиззуддин” зот ҳам Мотуридийнинг ўзи. Алишер Навоий бу масалада шубҳа бўлмаслигини назарга олиб, Мотуридийнинг тасаввуф дунёсини ҳам кўрсатиб беради. Жумладан, унинг “зоҳир ва ботин илмларида ороста” эканлигини таъкидлайди. Бу билан Мотуридийнинг дунёвий илмларда ҳам, Оллоҳ томонидан унинг қалбига, дилига руҳият орқали иноят этилган ботиний илмларда ҳам мақомига етган, зийнатларга эга бўлган, яъни қойим мақом авлиё эканлигини кўрсатиб берди. Алишер Навоий насли маҳоратида ёзиб қолдирган қўлёзмадаги қисқагина матндан олган тушунчамиз ана шундай оламшумул маънога олиб келади.

Ҳазрат Навоийнинг Мотуридий тўғрисидаги “Алардин фарид ҳолот манқулдур”, яъни улардин қизиқ аҳволлар нақл этилган, деган иборасига келсак, унинг тасдиғи сифатида Мотуридий тўғрисида бир лавҳа келтирилади. Унда ҳикоя қилинишича, бир куни Шайх Мотуридий ўз

жойида тафсир билан машғул бўлиб ўтирган чоғда икки маст киши келиб, уларнинг бирин Шайхнинг бу ишига беадаблик ҳаракати ва сўзлари билан “мушавваш”, яъни ташвиш солади ва Шайхнинг дилини хира қилади. Шайх ҳазратлари ул беадаб мастни таёқ билан уриб, оёғидан судраб чуқурга ташларкан, ўзи ҳузур билан қилаётган ишига машғул бўлади. Шу он ҳалиги мастнинг ҳамроҳи Шайх олдига келиб: “Ул кирган киши қани?” – деб сўрайди. Шайх: “Кишини билмайману, аммо бир ит келди, уруб ўлдурдум, чуқурда ётур”, – деб жавоб қилиб, чуқурни кўрсатади. Ўлган кишининг ҳамроҳи мастлик кайфида қараса, чиндан ҳам чуқурда ўлган ит ётарди. Бу ҳақиқатан гаройиб аҳвол эди. Шунда унинг мастлиги тарқаб, телбалиқдан соғайиб, Шайхга тавба айтиб, тўғри ўйлга ўтган экан.

Шундай қилиб, Алишер Навоий баён қилган ушбу лавҳадаги “хузур била қиладурғон ишларига машғул бўлдилар” иборасида буюк Шайхнинг шундай гаройиб вазиятда ҳам кўнглини тийган, ўз-ўзига хотиржамлик бағишлиған ҳолатини кўрамиз. Иккинчидан, Шайх Абу Мансур Мотуридийнинг муборак оғзидан чиққан “ит” иборасига монанд равишда маст телбанинг жасади унинг шеригига ҳақиқатан ит шаклида кўриниши ҳам Шайхнинг “каромати”дан далолат беради. Шунинг учун Алишер Навоий “Насойим ул-муҳаббат”нинг асосий сарлавҳасини “Авлиёуллоҳга воқеъ бўлғон хавориқ одот ва каромот баёни”, яъни авлиёлар ҳётида бўладиган файритабиий одатлар ва каромотлар баёни, деб атаган.

Ҳазрат Навоий ўзи ҳикоя қилган бу ҳёти -ҳол ниҳоясида: “Шайхнинг муборак қабрлари Самарқанднинг Чокардиза гўристонидадур. Замон подшоҳи ул мутабарруқ мазори бошида мутакаллиф (безатилган) масжид йасаптурс¹”, деб ёзади.

Ўзи ғоят зако, ўткир зеҳнли даҳо бўлган улуғ мутафаккир Алишер Навоий Мотуридийга Тангри иноят этган ботиний илмларни теран ва равшан фаҳмлаган ва таъкидлаб ўтган.

Шунинг учун ҳам унинг буюк ватандошимиз Шайх Абу Мансур Мотуридий ҳақида битган васфи ва таърифи

¹ “Насойим”, 99^а вараг.

биз учун беқиёс катта маънога эга. “Насойим ул-муҳаббат”да баён этилган бу бебаҳо сифатлар буюк Шайх Абу Мансур Мотуридий оламшумул даҳо, улуф аллома бўлганлигидан далолатдир.

Авлиё мартағасига эришган буюк зот бўлмиш Абу Мансур Мотуридий тасаввуфда аълам йўлбошли эди ва Исломда ҳам аълам бўлди. Агар Мотуридий тасаввуфда авлиё, аълам бўлмаганида Исломда ҳам аълам бўлолмас эди.

Абу Мансур Мотуридий илмий меросига оид асарлар, маълумотларга кўра, қуидагича кўрсатилади:

“Унинг энг муҳим асарлари сифатида қуидагиларни қайд этиб ўтиш мумкин”, деб ёзади А.Зоҳидий:

1. “Китаб таъвилат-ул-Қуръон” ёки “Таъвилати Аҳли сунна” – Қуръон ва Суннанинг расмий таъвиллари, яъни расмий исломий талқини, шарҳлари битилган китоб.

2. “Китаб мааҳаз аш-Шариъа” – Шариат асослари ва соғлиги ҳақидаги китоб.

3. “Китаб ул-Жадал” – диний-ақоидий баҳс-мунозараларда ғолиб келиш ҳақидаги китоб.

4. “Китаб ул-Усул” (“Усул ад-дина”) – диний таълимот услубиётига оид асар.

5. “Китаб ул-мақолот фи-усул ад-дин” – диний илмлар услубиётига бағишиланган мунозаравий мақолалардан тузилган китоб.

6. “Рисолат ут-тавҳид” – Оллоҳнинг яккаю ягоналиги, бирлиги, ваҳдоният дини, яъни илм-ул ақоиднинг назарий асослари ҳақидаги китоб.

7. “Китаб баян ваҳм ул-мўтазила” – мўтазила бидъат-ғавғолари ва ундан ҳайиқмаслик ҳақидаги китоб.

8. “Китаб радд аваъил-ул-адилла ли ал-Қаъбий” – мўтазилада қаъбийлар мактаби асосчиси Қаъбий залолатларининг бошланишини рад қилишга бағишиланган китоб.

9. “Китаб радд таҳзиб ал-Жадалли-Қаъбий” – Қаъбий илгари сурган Каломдаги баҳс усули (Жадал)ни рад этиш ҳақидаги китоб.

10. “Китаб радд ваъид-ул-фуссақ ли-л-Қаъбий” – Қаъбийнинг фисқ-фасод ваъдаларини рад этиш хусусидаги китоб.

11. “Радд ал-Усул ал-Хамса ли Аби-Муҳаммад ал

Боҳилий” – Аби Муҳаммад ал-Боҳилийга мансуб “Беш усул”, яъни Каломнинг баҳс муродала умдаларининг янги 5 талқин-усулини рад этиш ҳақидаги китоб.

12. “Радд Китаб-ул-Имама ли баъад ар-Равафид” – Рофизийлар ёмонлиги ҳақидаги Имома Китоби раддияси хусусидаги китоб.

13. “Китаб ар-Радд ала ал-Қаромита” – Қарматийларга раддияларга бағишиланган китоб.

Бундан ташқари, Мотуридий қаламига мансуб деб ҳисобланадиган, аммо ҳали тўла аниқланмаган машҳур асарлар ҳам манбаларда санаб ўтилади. Масалан, Имомул Аъзам-Абу Ҳанифанинг “Фиқҳи акбари аввал ва-с-сани” асарига шарҳ китоби, “Ақидаи Абу Мансур”, Имом Абу-л-Ҳасан Исмоил ал-Ашъарийнинг “Китаб-ул ибана ан усул-ал-диёна” китоби шарҳи ва бошқалар”¹. Аммо ушбу айтилган асарлар фанда аниқланган эмас.

Кўриниб турибдикি, Мотуридийнинг илмий фаолияти Исломни илмий жиҳатдан ҳимоя қилиш эди. Шунинг учун Исломнинг туб моҳиятидан оғган, узоқлашган “Муътазила”чиларга, “Бутун дунё Имоми” номини олган Каъбий қарашларига, шунингдек, Боҳилий, Рофизий ва Қарматийларнинг қарашларини илмий асосда фош этиб, уларнинг қусури, нуқсонлари, хато фикри илмни йўққа чиқаради. Мана булар Абу Мансур Мотуридийнинг амалга оширган оламшумул тадқиқотлари эди.

Баъзи ахборотларда юқоридаги асарлардан бештаси: “Китаб ал-Жадал”, “Таъвилоти аҳл ас-сунна”, “Китаб ул-мақомат”, “Китаб ат-тавҳид”, “Маъҳаз аш-шариъа” Мотуридий қаламига мансуб деб қаралади².

Оврупалик Ульрих Рудольф ўз монографиясида Мотуридийнинг юқорида кўрсатилган асарларини умуман тилга олмайди³. Бундан ташқари У.Рудольф Мотуридийнинг “Таъвилоти аҳл ас-сунна” ва “Китаб ат-тавҳид” асарларига теология нуқтаи назаридан ёндошса, Г.Э.Фон Грюнебаум⁴ тавҳидни мистицизм, деб атайди.

¹ Абдулқодир Зоҳидий. “Фан ва турмуш”. 1997 й., № 6. 12.

² “Шарқшунослик” тўплами. 1999, 9-сон, 66-бет.

³ У. Рудольф. “Ал -Мотуриди и суннитская теология в Самарканде”. Лейден-Нью-Йорк-Кёльн. 1977.

Классический Ислам. Москва. “Наука”. 1988, стр. 122.

Бу фикрларнинг ҳар иккаласига ҳам мутлақо қўшилиш мумкин эмас. Зеро, теология, умуман, илоҳиётшунослик бўлиб, “худо” саналмиш ҳар қандай жонли ва жонсиз мавжудот, табиат ҳодисалари унинг тадқиқ ва ўрганиш манбаи ҳисобланади. Мистицизм, мистика ҳам инсон руҳининг айни шу турли динлардаги “худо”лар ҳамда бошқа файритабиий кучлар билан бирлаша олишидан баҳс этувчи таълимотдурки, уни тавҳид у ёқда турсин, ҳатто Шарққа хос бўлган сўфийлик, тасаввуф илми билан ҳам умумлаштириш ноўриндир.

Энди Тавҳид калимасига Ислом қомусида бундай ёзади: “Ат-ТАУХИД (“ат-тавҳид от глагола ваххада – “делать, считать что-либо единственным, единственным”) – монизм, монотеизм. В исламе ат-Т. означал прежде всего отрижение политеизма (ширк), выражющееся в формуле “нет никакого божества, кроме Аллаха”. На уровне спекулятивной теологии проблема ат-Т. решалась в плане объяснения соотношения сущности (аз-зат) бога и его атрибутов (ас-сифат), творца и его творений”¹.

Таржимаси: “Тавҳид (ваҳҳада феълидан – бирор нарсани ягона деб билмоқ) – якка илоҳлик деган маънони билдиради. Исломда Тавҳид кўп худоликни инкор қилишдан иборат. Оллоҳдин бошқа илоҳ йўқдир, демакдир. Агар теологияга мажбурий қиёсласангиз, у ҳолда Оллоҳнинг моҳияти (зотига) ва унинг сифатларига Яратувчи (Холиқ) ва унинг яралмишлари (махлуқлари) дан иборат”. Демак, Тавҳидни мутлақ ҳеч қачон ва ҳеч вақт, ҳеч нимага қиёслаб бўлмайди. Шунинг учун: Ла илаҳа иллаллоҳ – Исли Оллоҳ бўлган зотдин бошқа Оллоҳ йўқдир деган экан, бунга бошқа қиёс ва назария кетмайди!

Демак, бу – ҳеч мисли, қиёси бўлмаган Оллоҳ, унинг яккаю ягоналиги, бирлиги ҳақидаги бениҳоя улуғ ва мураккаб фандирки, уни зўрлаб ҳам бошқа ҳеч қандай илму ижод маҳсули билан аралаштириб, уйғулаштириб бўлмайди.

Сирасини айтганда, Оврупо олимлари тасаввуф билан Исломнинг тафовутларини яхши англаб етмайдилар, бу масалаларга оид нозик илмлар фарқини

¹ Ислам. Энциклопедический словарь. Москва. “Наука”. 1991, стр. 232.

билимайдилар. Шу боисдан ҳам уларни қориштириб юборадилар. Масалан, тавҳид илми уларга бутунлай ёт, тушунарсиз нарса бўлганлигидан уни тайёр сийقا қолипларга жойлаб қўя қоладилар. Юқоридаги икки муаллифнинг нуқтаи назарлари бунга яққол далил бўла олади.

Мазкур масалаларда бизнинг қарашларимиз ва буюк бурчимиз аниқ. У ҳам бўлса тасаввуф таълимотининг Исломдан фарқлироқ қонун-қоидалари ва ўзига хос айрим нозик йўли мавжудлигини ойдинлаштиришдир. Ана шундагина муқаддас Ислом дини илми билан тасаввуф таълимотидан тўғри хулоса чиқара олиш мумкин бўлади.

Гап шундаки, Мотуридий қаламига мансуб “Тавҳид” асарида Оллоҳнинг яккаю ягоналиги, Оллоҳ бир эканлиги қатъий ва узил-кесил ҳал этилган эди. Куръоннинг “Ихлос” сураси тавҳид калимаси деб аталди. Сўнгра шариат бир, тариқат бир, маърифат бир, ҳақиқат бир деган қонун қарор топди. Шу сабабдан, теология Исломдан олдинги тушунчаларни қамраб олган бўлса, тавҳид фақат Ислом билан боғлиқ эканлиги мунозарасиз ҳақиқатга айланди.

Мотуридий “Тавҳид” асарини Куръони Карим асосида, унинг ҳар бир ояти, калимаси, ҳарфи сирини англаш нуқтаи назаридан ёndoшган ҳолда ёздики, бу улуғ ишга, сирлар сиррига бутун дунё лол қолди. Шунинг учун ҳам Мотуридий фикрига кўра, Куръони Карим, Ҳадиси шариф туб асос бўлиб, Ислом ақидалари шу асосга қурилмоғи лозим. Ўзгача назарияларга, яъни ҳар қандай мазҳабларга, бошқача фикрларга ўрин йўқ. Бу – чинакамига оламшумул ҳақиқат эдики, у баён бўлганидан кейин мазҳабларнинг хато талқинидан фақат бузуқ ниятли кучлар фойдаланиб келдилар. Қисқа қилиб айтадиган бўлсак, Мотуридий таълимотига кўра, бирдан-бир тўғри йўл – аҳли сунна вал-жамоа йўли бўлиб, бошқа ҳар қанақаси гумроҳликдир. Чунки исломда ўзгартиришлар, ислоҳотлар қилиш ярамайди. Зоро, пок эътиқод ҳақиқий инсонийликка, тараққий парварлик, эркинлик ва ҳурриятга, дунё ва барча оламлар сирини ўрганишга унрайди. Ҳар қандай ишда Илм йўлбошли бўлишини тарғиб қиласи. Чунки нодонлик – зулмат. Ундан фақат илм зиёси туфайлигина қутулиш мумкин. Мансур Ҳаллож

дорга осилишининг (301/ 921 йил) биринчи сабаби “Анал-Ҳақ” бўлса, иккинчи сабаби “Тавҳид”ни ошкора қилганлиги илмда аён эди. Алишер Навоий “Насойим улмуҳаббат”да Ҳаллож қатл этилишининг шу иккинчи сабаби ҳақида тўхталиб, унинг устози Абу Амру Маккий сўзларини келтиради: “Тавҳидда бу тоифанинг илмида сўз дақиқ эрди ва ёшуур әрди. Ул ёшуурн олиб, ани ошкора қилди. Сўзнинг диққати жиҳатидин эл фаҳм қилмай анга мункир (инкор этувчи) бўлдилар ва маҳжур (маҳрум) қилдилар. Ул Ҳалложни қарғадиким, Илоҳи биравни анга гумарларким, илк аёгин кескай ва кўзин ўйфай ва дорға тортқай. Ва барча анга воқеъ бўлдилар. Устоди дуоси била”¹.

Ҳар қалай, бу ерда бир номаълумлик борки, бу Мотуридий “Тавҳид” асарини қачон ёзганлиги масаласидир. Агар “Тавҳид” Ҳаллож қатлигача ёзилган бўлса, у ҳолда Ҳаллож ҳақиқатан уни ошкора қилган бўлиб чиқади. Борди-ю, “Тавҳид” қатлдан кейин ёзилган бўлса, Абу Мансур Мотуридий уни Ҳаллож қатли воқеасининг гувоҳи бўлгач яратган бўлади. Бу жумбоқни фақат “Тавҳид” асари ёзилган сананинг аниқланиши ойдинлаштиради. Бу кейинги изланишларга боғлиқ, албатта. Аммо бизнинг фикримизча, Мотуридий “Тавҳид” асари ёзилгандан сўнгра уни Ҳалложнинг ошкора қилгани билиниб туради. Яна бир сабаб, Форис бинни Исо Ҳалложнинг халифаси (ўринбосари) эрди. Навоийнинг ёзишича, ул зот Ҳаллож қатлидан кейин Бағдоддан Самарқандга келиб Мотуридий ёнида яшайди ва Самарқандда оламдан ўтади².

Масаланинг энг асосий негизи ва моҳияти Алишер Навоий ҳазратлари Мотуридий даҳосининг “зоҳир ва ботин улуми била ороста” лигини алоҳида таъкидлаб кўрсатилганлигидир. Бундан келиб чиқадики, “Султон ул-муъиззуддин” Мотуридийнинг тафаккур этиш, идрок қилиш, умумий қилиб айтганда, билиш иқтидори ўша “зоҳир ва ботин” илмларида эди. Анифи, файритабиий илмни унинг қалбига, дилига яратган Оллоҳнинг Ўзи иноят қилганида. Шу нуқтаи

¹ “Насойим”, 24 ^а варақ.

² “Насойим”, 24 ^б варақ.

назардан бу илмлар тарихи анъанага кўра икки туркумга бўлинган:

1. Зоҳирий илмлар. Бу туркумга барча ижтимоий ва табиий фанлар киритилган. Яъни, киши ўз кўзи билан кўриб, ўз ақлида қойим этган илмлар. Китоби ҳукмда эса айнул яқин, илмул яқин ва Ҳаққул яқин деб атаганлар.

2. Ботиний илмлар. Бу туркумга Оллоҳ ўзига яқин билган киши қалбига, кўнглига файби иноят этган илмлар киритилган. Бу илм ўз навбатида учга бўлинади:

— илми ладунний — Оллоҳнинг пайғамбарларига, ориф-авлиёларига иноят этилган илмлар;

— илми воридот — муайян зотнинг ақли ва фикрига иноят қилинган билим, тушунчалар;

— илми воқеъ — туш асносида аён қилиб уқтирилган илмлар.

Бу сиррул-асрор илми билан тасаввуф таълимоти аҳли бевосита шуғулланган. Кимларга файб илми юқтирилган бўлса, кимларгадир юқтирилмаган эди. Ушбу ботин илми ўзи ўқимай, ўрганмай, кўрмай эга бўлган, Оллоҳнинг ўзи ўша киши кўнглига берган илмлардир. Демак, бу илмлар Мотуридийга ҳам иноят этилган эди.

Энди тасаввуф масаласига келганда, бу таълимотни тушунишни кўпдан-кўп уламолар ўзларига мақсад қилиб келганлар. Бу тўғрида Алишер Навоий “Насойим”да ёзади: “Бирор Абу Ҳафз куддиса сиррухудин сўрдиким, тасаввуф недур? Деди: Сўфий ҳаргиз сўрмағайки сўфи кимдир.

Шайхул ислом (*пиро Ҳиравий Абу Исмоил Ансорий – Ҳ.И.*) дедиким, бу илм Тенгрининг асроридур”¹. Демакки, тасаввуф илми, бу Оллоҳнинг сирларига йўл тутиш илми экан. Бунда илм ибораси бор экан, бу фан демакдир. Яъни: Оллоҳ таолонинг сирларидурки, у оддий бандасига бу илмни юқтиримагандир. Бу тўғридаги яна бир аниқ тушунчани энг буюк авлиёлардан бўлган Абдулқодир Жилоний (1077–1165 м.) “Сиррул-асрор”да ёзади: “Тасаввуф калимаси тўрт ҳарфдан иборат: Та, Сод, Вов, Фа.

Та: *Тавбани* ифода этади. Бу иккига бўлинади. Зоҳирий тавба, ботиний тавба.

¹ “Насойим”, 28 ^б варак.

Сод: Сафо (ёргулиқ, равшанлик, порлоқлик. Ҳ.И.) ҳолини ифода этади.

Вов: Валоят (валийлик-Ҳ.И.) ҳоли. Бу ҳол ички оламнинг сафиятига тузилгандир.

Фа: Фано – йўқолиш мақомидир. Илоҳий сифатлар орасига кириб кетмишдир. (А.Жилоний. “Сиррул-Асрор”. Истанбул. 1996. 56-бет, қисқартириб олинди).

“Олимлар Оллоҳнинг хос қуллари”дир, деб ёзган Жилоний, уларни “Пайғамбарлар вориси сифатида улуғлайди, шу билан авлиёлар учун зоҳирий билим эмас, балки қалбига ботиндан тушган илм лозим”, деб кўрсатиб ўтган эди.

Абдулқодир Жилоний ёзади: “Тасаввуф аҳли дерларки, Вали пайғамбардин устундир. Сабаб ул дерларки: Пайғамбарга Жаброил воситаси ила илм келди, Валийнинг илми воситасиз”¹.

Мутасаввуф агар у тасаввуф таълимотига таянса Яратувчининг қудрат сирларини билиш сари йўл тутади, Ҳаққа йўл тутади. Демак, тасаввуф илми Ҳақиқати шундай бир тушунчаки, уни энг олий ва энг нозик фан билан қиёс қилгулиkdir. Зоро, Мотуридийнинг билиш назарияси ҳам зоҳирий илмларда зийнатлангани, ҳам Оллоҳ томонидан унинг қалбига иноят этилган ботиний илмларда зийнатлангани эди.

Тасаввуф – бу таълимот. Таълимот бўлганида ҳам, юқорида таъкидлаганимиздек, Оллоҳнинг сиру асрорларига йўл тутган таълимот. Бу йўл учта босқич: 1) дарвишлик; 2) сўфийлик; 3) фақирлик орқали ўтади. Шу босқичларни бирма-бир кўриб чиқадиган бўлсак, **ДАРВИШЛИК** – бу йўлга киришни англатса, **СЎФИЙЛИК** мазкур таълимотни ўрганиш; билиш ва унинг қонун-қоидаларига амал қилиш билан ўзини шу таълимот йўлига солишдан иборат. **ФАҚИРЛИК** – бу таълимотга эришиш, яъни мавжуд дунёning барча сирларини билиб, валийлик мартабасига етишиш йўлиdir. **ВАЛИЙЛИК** мартабасига етган инсон руҳан Оллоҳ билан мулоқотга киришади: “Факр дийдори Ҳақ таолодир”, “Ҳар ким кўрди – кўрмади”, – яъни – Оллоҳни зоҳир кўз билан эмас, кўнгил кўзи билан кўриш содир бўлади: Бу –

¹ Ўша асар. 123-бет.

Мансур Ҳаллож таълимоти эди.

Мотуридий ақидаси нимадан иборат эди, деган савол барчани қизиқтиради.

Мотуридий ақидаси шундай бир таълимотдан иборатки, инсон ақли ва фикри бовар қилмайдиган, Оллоҳ тўғрисидаги Сиррул-асорни Қуръони Карим асосида илми тадқиқ ва тадбиқ этиб, қоидалиқ ҳолда фан даражасига кўтариб берганидадир. Бу билан Илоҳиёт илмини такомилликка олиб чиқади. Илоҳиёт тўғрисида Мотуридий яратган таълимот, мунозарасиз ҳақиқат кашфига айлангани сабабли “Мотуридия ақойиди” сифатида шухрат қозонди.

Мотуридий ақидаси имоннинг етти шартига (ишончига) жамланганида. Жумладан: “Аманту биллаҳи ва малаикатиҳи ва кутубиҳи ва расулиҳи вал явмил охири вал қадари хайриҳи ва шарриҳи миналлоҳи таъола вал баъси баъдал мавт ҳаққун”. Яъни: Оллоҳнинг яккаю ягоналигига, фаришталарига, китобларига, пайғамбарларига, охиратга, тақдирга (яхши-ёмон), ўлгандан кейин тирилмоққа ишониш эди. Ушбу қоидага асосан Мотуридий илми таҳдил ва тадбиқ ила таълимот яратади. Даилил билан таҳқиқ этади. (Биз қисқача тўхтalamиз).

Мотуридий таълимотига кўра Оллоҳ бир, Оллоҳдин бошқа ҳеч қандай илоҳ йўқ. Оламнинг яратувчиси Оллоҳ бўлиб, Олам Оллоҳдин алоҳида яратилган борлиқ демакдир, талқинида исбот этади. Оллоҳнинг бирлиги тўғрисида маҳсус Тавҳид асарини яратади. Мотуридийнинг халқчиллиги шундан иборатки, у ҳеч қандай пайғамбарни инкор этмайди. Фақат Оллоҳни ҳар хил тушунчалардин пок этиш билан, унинг бир эканини далил билан исбот этади. Оллоҳнинг етти сифатини қойим мақомга олиб чиқади. (Ҳайй, Олим, Қодир, Самиъ, Басир, Мурид, Мутакаллим.) Калом илми билан исбот этади. Оллоҳу таъоло каломининг азали тўғрисида эса, “Оллоҳу таъоло калом билан сўзлашувчи зотдир”, деб уқтиради. “Каломнинг моҳияти Зоти орқали ҳарфлар ва товушлар билан ифода этилган маънодан иборатдир”, деб билдиради. Ирода масаласида, бир нарсанинг инсон орзузи билан бўлинг ~~еки буддистиги мөъжасига~~ кўра, бу Оллоҳнинг сифатига борлиқ ажани билдирилади. Ажал (ўлим) Оллоҳдин ~~Хар ким узажали билан ўлмайдир~~ Аммо

қандай ўлиши унинг ажалидир. Яралмишнинг ҳар бир феъли ва ҳоллари Оллоҳнинг қазо (бир воқеанинг рўй бериши) ва қадари (тақдири) билан вужудга келади каби дунёвий ва ҳаётий масалалар Калом илмида исбот этилади. Ўлгандин кейин тирилмоқни ҳам Калом илмида тасдиқ этади. Ушбу сабабларга кўра Имон дил билан иқор, тил билан иқор, қалб билан тасдиқлиги кўрсатилган. Иқорни дунё ишларига зарур деб кўрсатади. Ризқ – емак ва ичмакдир. Аммо қайсини танлашига боғлиқлиги, инсоннинг эрки диндир деб билдиради. Мотуридий инсонни, Ҳурриятни қадрлайди, Қомил инсонни ақли такомилликда деб билади. Шу боис юқоридаги масалаларда баҳс юритиб, далил ва исбот билан таҳқиқ хўмини чиқаради.

Мотуридий таълимоти бутун ислом оламида тан олингандин сўнгра, бу таълимот имоннинг ақидасига айланиб шуҳрат қозонган. Шу сабабли “Мотуридия ақойиди” деб ном олгандир. Мотуридий таълимоти ўзига хос мактаб сифатида ўзи яшаган замондин бошлаб, ҳозирги кунимизда ҳам буюк бир эътиқодга айланган. Унинг таълимотини ўз давридан бошлаб, Мотуридий асос солган таълимот мактаби вакиллари, уламолари давом эттиради. Бу мактаб аслида “Тафаккур” мактаби эди. Унинг буюк вакиллари Абул Қосим Самарқандий, Алоуддин Самарқандий, Нуруддин Аҳмад ас-Собуний ал-Бухорий каби алломалар Мотуридий таълимотида буюк асарлар яратди ва унинг таълимотини давом эттиради. Абу Мансур Мотуридийнинг Калом илмидаги ғалабасидан сўнгра Ислом оламининг буюк уламолари Қуръон тафсиirlарини янада кенг ёритишга муяссар бўлди. Жумладан: Ҳужжатул ислом И мом Фаззолийнинг (1058–1111) 40 жилд тафсири, Фахруддин Розийнинг (1149–1209) 37 жилд тафсири мисолимиздир. Абдулқодир Жилоний (1077–1165) эса “Сиррул-асрор” китобини ёзишга муваффақ бўлади.

Абу Мансур Мотуридий яратган Калом илми таъсири ўз замонасида жаҳон тафаккур оламида, инсоният маънавият дунёсида жиддий ўзгаришларга олиб келди. Замонаси олимларининг тафаккур оламини, маънавий дунёсини юксак даражада бойитди ва бугунги кунимизгача ўз қадрини сақлаб қолмоқда.

Мотуридийнинг илоҳий илмлар тўғрисида ёзган асарлари мунозарасиз ҳақиқатга айланаб, ўша даврдаёқ илмий ғолибликни қўлга киритади. Шу боис Мотуридий ёзиб қолдирган илмий асарлар Сунна аҳлиниңг ҳақиқий ва ҳаққоний эътиқодига айланганидан ушбу таълими эътиқоди “Мотуридия” деб шуҳрат қозонади.

Бу тўғрида Абу Тоҳирхожа “Самария” асарида: “Ножия (нажотчилар-Ҳ.И.) фирмасиким, уларни суннат ва жамоат аҳли дерлар. Эътиқод масалаларида икига бўлинадилар. Шайх Абу Ҳасан Ашъарийга қарайдиганлар “Ашоира” ва ҳазрати Абу Мансур Мотуридийга қараашлиларни “Мотуридия” деб атайдилар. Рум, Бухоро, Балх, Хоразм, Самарқанд, Фарғона ва Ҳиндистондек катта мусулмон ўлкаларининг барча халқи ва Туркистон ҳамда Қошғар каби мамлакатларда яшовчи эллар ҳаммаси Мотуридия эътиқодидадир”¹, деб ёзса, тарихчи Комилхон Каттаев: “Ином Аъзамнинг мазҳабига кирувчи суннийларнинг барчаси “Мотуридия” равиясига тобеъдурлар. Бу равия Кичик Осиё, Яқин Шарқ, Ўрта Осиё, Шарқий Туркистон (Фарбий Хитой) каби юртларда устувор ва кенг тарқалган. Бундан ташқари, Шимолий Африканинг Тунис, ал-Жазоир мамлакатларида тарқалган бўлиб, таркибан дунёдаги Сунний мусулмонларнинг учдан икки ҳиссасини ташкил этади”. (К.Каттаев. “Самарқанднинг буюк алломалари”. Самарқанд. “Зарафшон”. 1998, 68-бет), деб ёзди.

Абу Мансур Мотуридий илмий фаолияти оламшумул аҳамиятга эга эканлиги сабабли унинг “киши ақли ва фикри” етмас асарларига кенг ва нозик тадқиқот талаб этилади. Бу унинг асарлари устида жаҳон миқёсида синчковлик ила текшириш, изланишларни олиб боришни тақозо қиласди. Шу боис, ҳозирча Мотуридий фаолияти мажмуаси хусусида хуносча чиқаришдан олдин, унинг асарларини кенг кўламда ўрганиш вазифаси туради. Ушбу масалада камина ўз қараашларини ўртага қўяди:

1. Жаҳон қўлёзма хазиналаридан Мотуридий асарларини тўплаш.

2. Унинг асарларига бағишлиб ёзилган бошқа манбаларни аниқлаш.

3. Мотуридий асарлари ёзилган саналарни ўрганиш.

4. Бу борадаги тадқиқотларни марказлаштириш.

¹ Абу Тоҳирхожа. “Самария”. Тошкент. “Камалак”, 1991. 38-бет.

Мотуридий илмий-тадқиқот марказини ташкил этиш.

5. Унинг асарларини ўз тилимизга ўгириш.

Ўйлаймизки, бу тадбирлар “Султон ул-Муъиззуддин” шуҳратига эга ватандошимиз, тенги йўқ буюк уламонинг кўп қиррали фаолиятига тўлиқ ойдинлик киритиб, мазкур масалада фаннинг асосий мезони бўлмиш илмийлик даражасига эришилишига имкон беради. Бунинг учун Республикаизда илмий кучлар етарли. Гап уларга шароит яратиб, бу хайрли ишга сафарбар қилиша. Муҳими шундаки, Мотуридий жаҳон фанида Калом илмининг асосини белгилаб беради, илмнинг машҳур “Фолиби” Абу Мансур Мотуридий тадқиқотига мансуб буюк асарлари араб тилида ёзилгандир. Шу билан энг мураккаб масалалар билан боғлиқ бўлган, ул зотнинг ҳужжатлик ва дилиллик оламшумул тадқиқотлари мажмуасидан иборат мероси туради. Ўз навбатида бу таълимот “Мотуридия” деб аталади. Ислом оламидаги мусулмонларнинг асосий қисми Имом Аъзам мазҳабига киради ва Мотуридий таълимоти ақойидига асосан эътиқод қиласди. Мотуридий мероси бизнинг маънавиятимизнинг туб асосини ташкил этади. Зоро, Мотуридий ақидалари дунё мамлакатларининг барча ерига тарқалган эдилар. Эътиқодда эса Мотуридий таълимоти, амалда эса Имом Аъзам Абу Ҳанифа мазҳаби асос қилинган. Ислом оламида Жаноби Расулуллоҳ (С.А.В) йўлини ҳуқуқий ва қонуний тартибда Имом Аъзам давом этади. Бу тўғрида Алишер Навоий “Насойим”да бебаҳо ҳужжатли матнларни ёзиб қолдирган. Масалан: “Бидоятул авлиё, ниҳоятул анбиё фи аш-Шариат”¹ (Шариатда авлиёликнинг бошланиши, анбиёнинг тугатилиши).

¹ “Насойим”. 74 ⁶ варақ.

АЛИШЕР НАВОИЙ ИМОМ АЪЗАМ ТЎҒРИСИДА

Алишер Навоий “Насойим ул-муҳаббат” асарининг 10-авлиё тартибида ёзди: “Имом Аъзам қаддаса Оллоҳу таоло сирраҳу. Аларки ислом аҳлининг имомидурлар. Эл таърифидин мустағнидурлар (эҳтиёжсиз). Анас Молик разиоллоҳу анҳу ривоят қилурким, расул саллаллоҳу алайҳи васаллам дедиким: “Фи уммати ружулун йўқолу лаҳу Нуъмон бинни Собит ва кунятуху Абу Ҳанифа ва хува сирожун уммати”¹. (Таржимаси: Менинг умматим ичиди бир эр борки, уни Собит Нуъмон ўғли дерлар. Унинг куняси Абу Ҳанифадир. Ва у менинг умматимнинг чироғидур.)

Матн давоми: “Имом Жаъфар Содиқ била суҳбат тутурбур ва кўп машойихни кўрубтур. Ва фузайл Иёз ва Иброҳим Адҳам ва Башар Ҳофий ва Довуд Тойи раҳмаҳумоллоҳунинг устодидур. Нақлдорки, Мустафо саллаллоҳу алайҳи ва салламнинг муттаҳдар равзаси бошига бориб айтдики: Ассалому алайка ё Саййидул мурсалин. Равзадин жавоб келдики: Ва алайка-с-салом ё имомул-муслимин”².

Алишер Навоий ёзишича, умматнинг чироғи бўлган Имом Аъзам, юқорида муборак исмлари кўрсатилган биринчи даражалик машҳур авлиёларнинг устоди эди. Шу била жаноби Расул (С.А.В.) айтган башорат хитобидан, Имом Аъзамнинг мусулмонлар нурли йўлбошчиси даражасига мушарраф бўлганини биламиз.

Алишер Навоий матнида Имом Аъзамга узвий боғлиқ яна бир воқеа келтирилган. “Бир кеча воқеъада кўрдиким, Мустафо саллаллоҳу алайҳи ва салламнинг муборак сўнгакларин лаҳадда йифиб, баъзини баъзидин айрадур.

¹ “Насойим”. 6^а варак.

² Ўша асар.

Бу воқеъанинг ҳайбатидин уйғанди ва ибн Сириннинг асҳобидин бирига айтти. Ул мундоқ таббир қилдиким, Сен расул саллаллоҳу алайҳи ва салламнинг илми ва суннати ҳифзида (кўриқлашда) бийик даражага етгайсен, андоқки аҳодисда (ҳадисларда) мутасариф (эгалик қилувчи) бўлгайсен ва саҳиҳни (тўғрини) сақимдин (соҳтадин) айргайсен”. (Ўша варақ.) Бу пайғамбаримизнинг Имом Аъзамга билдирган энг умидлик ва ишончлик башорати эди. Матн давом этади:

“Ёно бир қатла расул саллаллоҳу алайҳи ва салламни воқеъада кўрдики, ул ҳазрат анга дедиким, ё Абу Ҳанифа! Сени менинг суннатларимни тиргумак учун зоҳир қилибтурлар, узлат (чекиниш) қасди қилма” (ўша варақ). Бу эса пайғамбаримизнинг Абу Ҳанифага айтган ҳукми эди. Матн давомида яна бир лавҳа келтирилган: “Наклдурки, Яхё Муоз Розий куддиса сирруху, Расул саллаллоҳу алайҳи ва салламни воқеъада кўруб сўрдиким, ё Расуллulloҳ! Сени қайда тилайин? Жавоб буйурдиким, Абу Ҳанифанинг илмий яқинида!” (ўша варақ.)

Демакки, Абу Ҳанифа (699-767м.) ўз илми билан жаноби Расул (С.А.В.)дан кейинги, ул зотнинг илми ва суннатларини амалга оширувчи ҳамда давом эттирувчи йўлбошчи – Имом эди. Ушбу Имом мартабасига қўшилган яна бир “улуг” сифати ила Имом Аъзам Абу Ҳанифага мушарраф бўлиш билан Ислом оламида Ислом аҳлининг, Ислом илмининг улуг йўлбошчисига айланиб бўлгани эди. Агар Исломнинг суннийга хос йўналишида унинг тўрт имоми тўғрисидаги манбага келсак, Абу Ҳанифадин бошқа бирорта Имомга, Расул (С.А.В.)нинг бешта башорати (хушхабари) айтилмаганини кўрамиз. Демакки, Имом Аъзам ана шу сунна (илмда аҳли сунна деб атайди), йўналишнинг Имоми Аъзами эрди. (Қаранг: Васлий Самарқандий. Имом Аъзам тарихи. Т., Ёзувчи нашиёти, 1995 й.)

Энди Суннийлик тўғрисидаги илмий асарларга келсак, бу тўғрида қуидагича ёзади:

“Суннийлик (сунна сўзидан) – ислом динидаги икки асосий йўналишдан бири ва энг кенг тарқалгани. Мутахассислар ҳисоблари бўйича, жаҳондаги барча мусулмонларнинг қарийб 90 фоизи С.ка (қолган 10 фоизи – шиаликка) мансуб. С. тарафдорлари асосан Осиё ва Африкада (Покистон, Бангладеш, Ҳиндистон, Индонезия, Малайзия, Хитой, Шарқий Туркистон, Афғонистон, Туркия, Арабистон ярим ороли ва Форс кўрфази атрофидаги араб мамлакатларида, Сурия,

Ливан, Иордания, Эрон, Шимоли-Шарқий ва Фарбий Африка мамлакатларида), шунингдек (Озарбайжон ва Тожикистоннинг төглиқ районларидан ташқари), Болгария, Югославия, Албания, Кипр ва АҚШда яшайдилар”¹.

Алишер Навоий ёзиб қолдирган Имом Аъзам Абу Ҳанифа, Шайх Абу Мансур Мотуридийга оид маҳсус ёзилган манбалар Мавлавий Абдураҳмон Жомийнинг 618 авлиёлар тўғрисида ёзган “Нафаҳот ул-унс” асарида ва Шайх Фаридуддин Атторнинг 100 га яқин авлиёлар тўғрисида ёзган “Тазкират ул-авлиё” асаридан ўрин олмагандир.

Агар бизга Абу Ҳанифа ким эди, деган савол билан мурожаат қилинса, бизнинг жавобимизни Алишер Навоийдан топсин!

Абу Ҳанифа Шариат асосидаги фиқҳ илмининг асосчиси эди. Ул зот ҳуқуқ ва қонуннинг илмий таҳлили асосида фиқҳ илмига асос солди. Зоро, шариат ҳуқуқларини қоидага солган ва уни қиёсий тадқиқ этган илоҳиётчи эди. Имом Аъзам ўз даврида ёзган “Абвоби фиқҳ” асарига асосни тўнгич Турк машойихи Абдуллоҳ Муборак (118/736, 181/797) 20 минг ҳадисни ўз ичига олган асарларини ана шу Абу Ҳанифанинг “Абвоби фиқҳ”ига кўра тартиб берган экан².

Ўз-ўзидан билиниб турибдики, фиқҳ илмига асосни Абу Ҳанифа, калом илмига ғалабаи асосни Абу Мансур тузган эканки, Ислом илмий дунёси, бутун дунё инсоният аҳли бизнинг буюк бу икки зоти муборакларга таҳсин қилишдан ўзга чораси йўқ. Ҳар икки уламоий авлиёнинг насл-насаби эса улуф Турон тупроғидандурлар.

Абу Ҳанифанинг келиб чиқиш насабида баҳслик маълумотлар мавжуд. Гап бизнинг бу манбаларни ўрганмаганимизда. Аммо Алоуддин Мансурнинг ёзишича, Имом Аъзамнинг бобоси Кобул шаҳрида туғилган. Ислом фатҳида ул зот тақдир иродаси илиа Ироқнинг Куфа шаҳрига асирликда келиб қолган³.

Госем Мамед ўғли Керимов Абу Ҳанифанинг келиб чиқишини туркийлардан деб ёзади⁴.

¹ Ислом. Справочник. ЎзСЭ. 1989. 246-бет.

² “Илоҳий ҳадислар”. Тошкент. “Чўлпон”. 1994. 68-бет.

³ “Имом Аъзам – буюк имомимиз”. Тошкент. F. Фулом. 1994. 68-бет.

⁴ Г. М. Керимов. “Шариати его социальная сущность”. “Москва. “Наука”. 1978. стр. 15.

НУРУДДИН АС-СОБУНИЙ АЛ-БУХОРИЙ МОТУРИДИЙ АҚИДАСИ ТҮҒРИСИДА

Ҳанафийя ва Мотуридийя мактаби олимларининг давомчиси бўлмиш Нуруддин Аҳмад ас-Собуний Ал-Бухорий ёзган “Ал-бидояти фи-усулуддин” (Дин асосларининг ибтидоси) араб тилидаги асари фанда маълум. Ушбу асарни туркиялик олим Бакр Тупол ўғли турк тилига афдаради. Бу асарни “Мотуридия ақойиди” деган номда нашр этади.

1998 йилда 6-нашри чоп этилади. Нашрга асарнинг асли – араб хатидаги матни ҳам тўла берилган. Унинг кўрсатишича, ас-Собуний асли Бухородан бўлиб, шу ерга дафн этилган. Вафоти 580 ҳижрий йили (1184 м.) кўрсатилган¹. Абулкарим ас-Самъонийнинг “Ал-Ансоб” (“Насабнома”) асарида ҳам вафоти 580 ҳижрий йил деб кўрсатилган. (“Насабнома”. Бухоро. 1999. 39-бет.) Аллома отининг тўла аталиши: Имом Аҳмад бин Маҳмуд Аби Бакр ас-Собуний ал-Бухорийдир. Нуруддин (диннинг нури) эса буюк алломанинг сифатидир. Аммо асарнинг ёзилган йили кўрсатилмаган. Асар 32 кичик мавзуни ўз таркибига олади.

Мотуридия ақойиди деганига сабаб улдурки, Имом Нуруддин ас-Собуний ал-Бухорий Мотуридий асарларида илгари сурилган таълимотга асосан ёзгани кўринади. Биз уч қисми билан чекланамиз. Асарнинг биринчи қисми мавзуси “Оlamning яратилиши” деб аталади. Олим бу мавзуни “Оlamning яратувчиси Оллоҳдир. Olam дегани Оллоҳдин ўзга бор бўлган нарсалар отидир. Olam эса, Яратувчиси борлигини кўрсатадиган белгидир” ҳукмида кўрсатиб, “Вожиб ул-вужуд” – яратувчидир (Жалла жалолаҳу), деб белгилаб беради.

¹ “Ақойиди Мотуридия”. Анқара. 1998. 10-бет.

“Қадим вужуднинг ибтидоси бўлмаган нарсадир. Ҳодис эса, олдин бўлмаган, сўнгра бор бўлган нарсадир”, деб ёзади. Иккинчи қисмида Тавҳид – Яратувчининг якка-ягоналиги тўғрисидаги далили келтирилган. Фанда энг муҳим бўлган ушбу Тавҳид қисми Калом илмига асосан исбот этилади. Бу қисм биз учун аҳамиятлиdir: “Инналлоҳу таъоло воҳидун ла шарика лаҳу”. Яъни: (Оллоҳу таъоло ягонадир ва унинг шериги йўқдир). Ушбу масалада санавийя, маъжусийлар (оташпастлар), насоралар (христианлар), табиатчилар, афлокиялар (Коинотчилар) ихтилоф қиласидилар”, деб ёзган олим, санавийя ва маъжусийларнинг Яратувчини икки деб билгани – эзгулик худоси ва ёвузлик худосига ажратишини, баъзилари нур ва зулмат – яъни яхшилик ва ёмонлик худосига ажратишини эслатиб ўтади. Насоралар эса Яратгувчини: Зот, Илм ва Ҳаётга бўлганини кўрсатади. Яна христианлар эса Ота – худо, ўғил – худо, – бу Исо ва хотин – Худо – Биби Марямни тасаввур қиласидилар, деб ёзади. Табиатчиларнинг эса тўртта бўлгани: ҳарорат, совуқлик, рутубат (намгарчилик) ва қурғоқчилик деб айтишини келтиради. Афлокиянинг еттига бўлишини: Зухра (Сатурин), Муштарий (Юпитер), Миррих (Марс), Зухра (Венера), Уторид (Меркурий), қуёш ва ой сайёralарини эслатади. Ушбу фирмаларнинг барчаси шону шарафи юксак бўлган Оллоҳни инкор этишдир, деб ёзади. Бу инкорий қарашлар билан баҳс юритиб, Калом билан жавоб берадики: Оллоҳ шундоқ бир борлиқки, у мутлақ якка-ягона, яъни “Оллоҳдин ўзга илоҳ йўқдир. У ягона Ҳоким ва ғолиб бўлгучининг ўзи фақат Оллоҳдир”, деган ҳукмини чиқаради.

Оллоҳнинг сифатлари қисмида эса: “Сунна аҳли шундай дейди: Оллоҳ Таоло камол сифатлари билан васф этилган. У азалий, абадий ва қадимдир ва ўз зоти билан мавжуддир. Бу сифатлар ҳеч бир важҳ била яратилмишларникига ўхшамайди. Булар: Ҳайй, Олим, Қодир, Самиъ, Басир, Мурид, Мутакаллим (доим ҳаёт, билувчи, қудрат эгаси, эшитувчи, кўрувчи, тилавчи, сўзлавчи). Унинг камол сифатлари булар билан тугамайди. Оллоҳу Таъоло ҳаёт, илм, қудрат, ирода, самиъ (эшитиш), басир (кўриш) ва камол сифатларига ҳам

эгадир”, деб ёзади. Шу билан мұтазилачилар, ашъарийлар (Калом илмий оқими)нинг хато фикрларини фош этади. Ниҳоят Оллоҳнинг абадий ҳаёт билан бўлганини Қуръон калимасида исботи келтирилади: “Ҳувал ҳайу ла илаҳа илло ҳувва” (У тирик зотдир. Ҳеч қандай илоҳ йўқ, магар унинг ўзигина бор); “Ва ҳувал алимул ҳакиму” (У ҳаммани билувчи, ҳикмат эгасидир); “Ва ҳува самиъул басир...” (У ҳаммани тинглавчи ва кўргучидир); “Ва ҳува ала кулли шайъин қадирун” (У ҳар нарсага қодирдир); “Ҳуваллоҳу ал-холиқул бориюл мусаввиру” (Оллоҳ яратгувчидир, йўқни бор этгувчидир. Барча нарсага суврат, шакл бергувчидир) каби Калом илмий моҳиятини кўрсатиб беради.

Демакки, ушбу таълимотларнинг илмий замирида, ҳукми холосасида Абу Мансур Мотуридийнинг Калом илмидаги ғалабаси тураг эди. Нуруддин Аҳмад ас-Собуний ал-Бухорий ёзган “Дин асосларининг ибтидоси” асари, Мотуридий асос солган илмлар мажмуаси дастури сифатида бутун дунёга тарқади.

Имом Нуруддин Аҳмад ас-Собуний ал-Бухорийнинг илмий фаолияти бениҳоя буюкдир. Имом Абу Мансур Мотуридий таълимотини фан асосида авлод учун мерос қилиши ҳаммага насиб бўлмайди. Бу машҳур асарни “Илмий қомус кашфи” десак хато бўлмас.

ХУЛОСА

Алишер Навоийнинг “Насойим ул-муҳаббат” тазкираси тарихий ҳужжатдир. Асар УІІ асрдан бошлаб то Навоий ўзи яшаган давргача яшаб ижод этган ва фаолият кўрсатган авлиёлар мажмуасидир. Шул боис асарнинг аҳамияти биз учун бебаҳодир. Алишер Навоийнинг Мотуридий тўғрисидаги васфи ва Абу Ҳанифа тўғрисидаги келтирган ибратли далиллари биз учун тарихий меросдир.

Шайх ва Имом Абу Мансур Мотуридий асос солган Калом илми Ислом илмининг ақидасига айланди, инсоният тафаккур оламининг маънавий бойлиги негизини белгилаб берди. Мотуридий илмий дунёқараши жаҳон тафаккур оламида туб ўзгаришларга олиб келди. Оллоҳ тўғрисидаги неча минг йиллик баҳсли, ҳар хил тушунчаларга ул зоти муборак ёзган “Тавҳид” асари якун ясади. Натижа шу бўлдики, Ислом илми оламида, Ҳанафийя амали, Мотуридия эътиқоди асос қилинди. Мотуридий ёзib қолдирган илмий асарлар мажмуаси жаҳон халқлари мероси булиб қолди. Бу мерос Оллоҳ, олам ва мавжудотлар тўғрисидаги ҳамда инсон тафаккур олами тўғрисидаги буюк кашфиётга айланди.

Имом Аъзам Абу Ҳанифа шариатни Қуръон асосида фиқҳ илми билан белгилаб, уни расмий тизимда, инсоннинг ҳуқуқи ва ошкора амалини белгилаб берди. Мотуридий эса Исломнинг Калом илми билан бир эътиқодда бўлишини белгилаб берди. Бу билан фиқҳ илмида Имом Аъзам, Калом илмида Абу Мансур Мотуридий буюк кашфиётларни амалга оширдилар. Ҳар икки авлиё уламомимизнинг илмий асарлари натижасида ва уларнинг таъсирида инсоният оламида тубдан ўзгаришлар майдонга келди, эътиқодни илмий

асосда фан даражасига кўтарди. Демакки, жаҳон фанида янги қонун, янги таълимот яратилди.

Бизнинг буюк аждодларимиз асос солган дунёвий илмлар, таълимотлар, кашфиётлар билан қутлуғ Ватанимизнинг шону шуҳратини жаҳонга танитди.

Улар бизнинг, келажак авлоднинг ифтихори, шарафли устодларидир. Авлодлар буларни ҳеч қачон унутмайдилар.

МУНДАРИЖА

Сўз боши.....	3
Абу Мансур Мотуридий ас-Самарқандий.....	6
Абу Мансур Мотуридий Навоий васфида.....	7
Алишер Навоий Имом Аъзам тўгрисида.....	21
Нуруддин ас-Собуний ал-Бухорий Мотуридий ақидаси тўгрисида.....	24
Хулоса.....	27

Адабий-бадиий нашр

Ҳамидхон Исломий

**СУЛТОН УЛ-МУЬИЗЗУДДИН АБУ МАНСУР МОТУРИДИЙ
АС-САМАРҚАНДИЙ**

Муҳаррир *Ж. Субҳон*

Мусаввир *P. Зуфаров*

Бадиий муҳаррир *M. Карпузас*

Техник муҳаррир *T. Смирнова*

Кичик муҳаррир *H. Фозилова*

Мусаҳҳиҳ *M. Насриддинова*

Компьютерда саҳифаловчи *C. Раҳмедова*

ИБ№ 3914

Босишига 12.10.2000 й. да рухсат этилди. Бычими 84x108¹/₃₂. Таймс гарнитура. Офсет босма. 1,68 шартли босма тобоқ. . 1,4 нашр босма тобоги. Жами 1500 нусха.⁶³...рақамли буюртма. 131-2000 рақамли шартнома. Баҳоси шартнома асосида.

Ўзбекистон Республикаси Давлат матбуот қўмитасининг
Faafur Fулом номидаги Адабиёт ва санъат нашриёти. 700129,
Тошкент, Навоий кўчаси, 30

МЧЖ. "Арна Принт". Тошкент шаҳри. X. Бойқаро, 51.

Исломий, Ҳамидхон.

Султон ул-Муъиззуддин абу Мансур Мотуридий ас-Самарқандий. –Т., F. Фулом номидаги Адабиёт ва санъат нашр., 2000.– 32 б.

Калом илмининг ғолиби – Абу Мансур Мотуридий таваллудининг 1130 йиллиги муносабати билан чоп этилган ушбу рисола улуғ даҳо тўғрисида буюк мутафаккир Алишер Навоий ёзиб қолдирган манба асосида битилгандир.

Муаллиф асосий дикқатни Шайх Абу Мансур Мотуридийнинг авлиёлик мартабасига ва шу юксак мавқе туфайли ёрқин намоён бўлган буюк алломалик салоҳиятига қаратади ҳамда мазкур илоҳий фазилатларнинг умумий инсоний самараларидан бири бўлмиш унинг “Тавҳид” асари ҳақида фикр юритади.

Рисолада Мотуридий мероси устида сўз борар экан, унинг ақойиди ҳамда “Мотуридийя” мактаби давомчиларидан Нуруддин ас-Собуний ал-Бухорийнинг Калом илми давомчиси эканида ҳам тўхталинади ҳамда фикҳ илми асосчиларидан бири Абу Ҳанифа тўғрисида маълумотлар келтирилади.

Асар тасаввуф тарихи, фалсафа ва манбашуносликка қизиқувчи китобхонларга мўлжалланган.